

# Ақ Жұлдыз

БАЛАЛАР МЕН ЖАСӨСПІРІМДЕРДІҢ РЕСПУБЛИКАЛЫҚ ЖУРНАЛЫ




**Б**аланың әлемді тануы әліппеден басталады. Міне, сондай бір әліппеден қазақ бүлдіршіндері отыз жылға жуық сусындап, көздерін ашты. 1993 жылға дейін мектеп табалдырығын аттағандар бұл есімді жақсы таниды: Мәдіхат Сейітқожаұлы Төрежанов. Оның жазған “Әліппе” оқулығы кезінде бүкіл республиканы аралап кетті. Жасөспірімдердің жүзіне шуақ ұялатып, бірден баурай жөнелетін осы оқулық әр мектепке таныс еді. Өйткені М. Төрежановтың “Әліппесі” балаларды білім әлемімен таныстырып, үлкен жолға бастайтын негізгі оқулық болып келді. Енді осынау белгілі автордың өмір жолына үніліп көрейік. Қазіргі жастар да бұл есімнен хабардар боп жүрсін.

Төрежанов Мәдіхат Сейітқожаұлы – белгілі балалар жазушысы, ұлағат-



## МОЛ МҰРА ҚАЛДЫРҒАН



ты ұстаз, халық ағарту ісінің үздігі. Ол 1921 жылғы 30 сәуірде Ақмола облысының Алексеев ауданында, (ертеректе Бәймен ауылы аталған) Еңбек елді мекенінде дүниеге келген.

Әкесі діни білімі мол, медресе, мешіт ұстаған алғыр ойлы Сейітқожа хазіреттің екінші баласы – Мәдіхат еді.

Мектепті бітіргеннен кейін, 1939 жылы Петропавл педагогикалық техникумы жанындағы жеті жылдық мектептер үшін қазақ тілі мен әдебиеті пәнінің оқытушыларын даярлайтын курсты бітіріп, алғашқы еңбек жолын

Ресейдің Омбы облысының Шарбақкөл ауданындағы Бірінші Май орталау мектебінде бастайды. Кейін Ақмола облысының Қорғалжын орта мектебінде оқу ісінің меңгерушісі және қазақ тілі мен әдебиеті пәнінің оқытушысы, 1952 жылдан бастап Ақмола облыстық мұғалімдердің білімін жетілдіру институты қазақ тілі мен әдебиеті кабинетінің меңгерушісі қызметтерін атқарды.

1964 жылдан бастап 1993 жылға дейін М. Төрежанов жазған “Әліппе” оқулығы республиканың барлық мектептерінде оқытылды.

Мәдіхат Төрежановтың творчестволық жолы 1938 ж. басталған. Балалар әдебиетіне арналған он алты кітабы жарық көрді. Ол “Құрмет белгісі” орденінің иегері, көптеген медаль, грамоталармен марапатталған.

Халқының алдында өлшеусіз еңбек еткен үлкен жүректі азамат, ұлағатты ұстаз, белгілі балалар жазушысы Мәдіхат Сейітқожаұлы Төрежанов 1996 жылы өмірден озды. Көзі жоқ болғанымен, артына қалдырған мол мұрасы әлі де туған халқының игілігіне айналады.

**Ырысалды ӨМІРТАЕВА,**  
№4 қазақ мектеп-гимназиясының бастауыш сынып мұғалімі.  
Астана қаласы.